

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



VASEGA MATUTUA



IANUARI - IUNI

XX

2026

SAUNIA : OFISA O A'OA'OGA KERISIANO



Ekalesia Faapotopotoga Kerisiano i Amerika Samoa

TUSI AOGA ASO SA



VASEGA MATUTUA



IANUARI - IUNI



2026

TUSI AOGA ASO SA 2026.....VASEGA MATUTUA

1. MATAUPU MUAMUAFEPUARI 01, 2026
2. MATAUPU LUAFEPUARI 08, 2026
3. MATAUPU TOLUFEPUARI 15, 2026
4. MATAUPU FA ‘AMANATU..... FEPUARI 22, 2026
5. MATAUPU FAMATI 01, 2026
6. MATAUPU LIMAMATI 08, 2026
7. MATAUPU ONOMATI 15, 2026
8. MATAUPU FITUMATI 22, 2026
9. MATAUPU FA’AMANATUMATI 29, 2026 (ASO SA LAUPAMA)
10. MATAUPU VALUAPERILA 05, 2026 (ASO SA O LE ESETA)
11. MATAUPU IVAAPERILA 12, 2026
12. MATAUPU SEFULUAPERILA 19, 2026
13. MATAUPU FA’AMANATUAPERILA 26, 2026
14. MATAUPU SEFULUTASIME 03, 2026
15. MATAUPU SEFULULUAME 10, 2026 (ASO SA TINĀ)
16. MATAUPU SEFULUTOLUME 17, 2026
17. MATAUPU SEFULUFA ME 24, 2026 (ASO SA PENETEKOSO)
18. MATAUPU FA’AMANATUME 31, 2026
19. MATAUPU SEFULU LIMA IUNI 07, 2026
20. MATAUPU SEFULU ONOIUNI 14, 2026
21. MATAUPU SEFULU FITUIUNI 21, 2026 (ASO SA O TAMĀ)
22. MATAUPU FA’AMANATUIUNI 28, 2026

FEPUARI 2026.....IUNI 28, 2026

ASO SA FEPUARI 01, 2026

MATAUPU: O LEĀ LE IGOA.

TUSI FAITAU: GALUEGA 11:19-26

SINI: Ia manino fanau e taua igoa ua fa'aigoaina ai tatou, a'o le igoa sili ona tauā o le igoa o Iesu lo tatou Ali'i fa'aola.

FESOASOANI MO LE FAIAOGA: Viia a le Ali'i i mea uma, ua toe aulia mai lenei tausaga fou ma le amataina o la tatou aoga Aso Sa. Malo le onosa'i i le savaliga o lenei tausaga ua amataina, o le fa'amanatu masani lava mo tou susuga a faiaoga tautuanā ia lava pea se taimi e su'esu'e ma faitau ai le tusi faitau 'ina 'ia maua lelei se fa'asoa mo fanau. Manuia le fa'asoa.

FESOASOANI MO LE MATAUPU: O le isi lea tusi na tusia e Luka, o fa'amaumauga i galuega a le Ali'i na fa'aauauina e le 'au aposetolo, o la latou sao fo'i lea i nu'u ese. O le tala'i atu o le tala lelei i nu'u o lo'o ta'ua i le tala; o Foinie, ma Kuperu, ma Anetioka, ua latou fa'amatalaina ma folafola atu le Ali'i o Iesu. O la latou tala'iga e le'i faigofie auā na latou tala'i lava i nu'u sa lē talia ai lē talalelei ia Iesu. E ui ina le faigofie ona talia 'ae sa laualuga lava le fiafia o tagata e talia lea tala, ma ua liliu mai i latou i le Ali'i. O lea fo'i tala sa logo atu i Ierusalem, ma 'ua latou aauina atu Panapa ia o'o lava i Anetioka fia iloa le tulaga ua iai le 'au fa'atuatua i le Ali'i o Iesu. E le'i gata iina, auā sa ia saili pea ma 'ua o'o atu i Taso e saili iā Saulo na ia mauaina ma aumai ia te ia i Anetioka. O iinei sa la mafuta ai ma fa'aauauina le talaiga ma 'ua atoa le tausaga o mafuta pea, ma 'ua ola le tala'iga e ala i le igoa o Iesu. O le mea fo'i lea na fa'aigoaina ai i le 'au so'o o kerisiano i Anetioka. Fanau taua le igoa, e fesiligia ai fo'i i tatou pe seā le uiga o lou ma lo'u igoa, e lē mafai fo'i ona malamalama se tasi pe ā le iloa le igoa. Manatua Iesu, le igoa sili, e taua ma e tataua ona matuā tumau i le fa'atuatua ma tala'i pea le igoa lea e tatou te maua ai mea lelei e tele.

TAULOTO: Galuega 11: 26

GALUEGA FA'ATINO: Fa'asoa i le o'o mai o le Agaga Paia, ma 'ua maua ai le loto atu i le tala'iina o le igoa o Iesu? O le ā sona tāua? O le ā fo'i se mea tāua ai le maua o lenei Agaga e fai ma fesoasoani sili i le tagata?

A'OA'OGA: O NAI A'OA'OGA MO LE FA'ASOA!

1. E taua igoa, e tataua lava ona iai le igoa e femalamalamaa'i ai.
2. Ia fiafia e tala'i le tala tau iā Iesu, auā o le tala lea e maua ai le ola.
3. E leai se tasi igoa e sili, e sili lava le igoa o Iesu.
4. O le avefa ma so'o, o le alofa fo'i lena i le Keriso toetu.

PESE: PESE MA VIIGA (Pese 177 fuaiupu muamua ma le tali)

TATALO: Fesoasoani mai pea lau afio iā te'i matou, ma 'ia maua manatu lelei auā le fa'asoa pea. Fa'amagalalo i matou uma, o matou sesē ma agasalala fa'amamā i matou ma tumau mai iā i matou. Amene!

MANUIA SAUNIGA O LENEI ASO SA.

ASO SA FEPUARI 08, 2026

MATAUPU: RUTA SA TAOFI I LE TALOSAGA.

TUSI FAITAU: RUTA 3:6-18

SINI: Ia iloa e fanau e lelei ā togafiti, a’o togafiti e anoa ma maua ai se talosaga mautū, e pei ona fa’ailoa e Ruta mo lana tama o Naomi.

FESOASOANI MO LE FAIAOGA: Taeao manuia, taeao toto’a i le alofa o le Atua, ua tatou aulia mai lenei taeao fou auā le amataina o ā tatou aoga Aso Sa. Tāua le iai pea o se api ma se peni, atoa ai ma le Tusi Paia e tatau lava ona faitau ma malamalama pea tamaiti, atoa ai fo’i ma lau susuga mo le mataupu o lenei taeao. Manuia le tapenaga a lau susuga.

FESOASOANI MO LE MATAUPU: Ua manino le tala lenei i le tinā ia Naomi, na nofo tane atu i le tama a Ruta. Ua maliu le tama, ma ‘ua mana’o fo’i Ruta e toe fo’i Orepa ma Naomi ua le toe iai se tama tane o totoo ia te ia. Ua fo’i Orepa, a’o Naomi ua le mafai ona fo’i, ua alofa mutimutivale lona alofa i le tinā o lana tane. Ua taumafai lava la Ruta e saili auala mo lana tama o Naomi. Ua iloa e Ruta Poasa, le sa alofa iā Naomi ma faigaluega i lana togā karite, ua tupu lona naunau e tausi tama Poasa i si to’alua o lana tama, o Naomi. Lea ua ia fai atu ai e alu e galue ma tausi ia e Poasa, foliga o se togafiti lea mea auā ua fiu e tuli i lona aiga, ‘ae lagona ā lona alofa iā Ruta le tina o si ona to’alua. Ua taumafai Ruta e vavae ese le loto o Naomi ma ua ia mana’o ai e faiava ia Poasa le auauna mauoa. Ua fa’atino e Naomi le fa’atonuga a Ruta, ia alu atu ma feiloa’i ma Poasa i lona fale saito, ma ta’u iai le mea e tatau ona fai. Ia alu atu ua uma ona ai, ma inu ona taoto lea e moe, ua moe Poasa ‘ae taoto atu i vae Naomi, ma ua iloa ai le manatu alofa o Ruta i si ana tama. Taumafaiga ia alu lava ma le manuia e saili se isi tautoga mo ia, ua fai lava ma ala na talia ai e Poasa Naomi e fai ma ona to’alua. Ese lava faiga a le Atua fanau, e tāua fo’i mo i tatou, ina ia taofi i talosaga e pei o le talosaga a Ruta le tinā tausi ia Naomi. O a mea uma e talosaga ai matua, ma tagata matutua mo tatou ia tatou taofi ma faia e ala i le fa’alogo ma usita’i. O le usita’i i matua, o le fa’alogo fo’i lenei i le Atua ma le musumusuga a le Agaga. Mana’omia e matua fanau usita’i auā ua lē faigofie nei aso ma le ta’aviliga o le lalolagi ua iai.

TAULOTO: Ruta 3: 8, 9

GALUEGA FA’ATINO: Tāua le fesiligia pea o fanau po’o atagia i le tala sa fa’amatalaina uiga o le tina o Ruta, atoa ai ma uiga o le tina iā Naomi. Tatala le avanoa fa’asoa.

A’OA’OGA: O NISI O A’OA’OGA E FA’AILOA PE Ā UMA ONA FESILI I FANAU.

1. Ia fa’aa’oa’o ia Naomi le tinā na alofa le uma i le to’alua o lana tama tusa lava pē ‘ua mou atu.
2. Ia taofi pea a tatou talosaga e fai aemaise lava fanau ia maumaututū le ola saili i le Atua.
3. Ia alofa atu i so’o se tagata ese e pei o Poasa le auauna na alofa iā Naomi.
4. Fa’alogo i le musumusuga a le agaga e tumau ai pea le alofa e pei ona fa’aalia i le tala.
5. O le alofa e lautua ai mea uma, alofa atu, alofa mai ma alofa i so’o se tasi.

PESE: Pese ma Viiga (Pese 94)

TATALO: Ua mae’a la matou fa’asoa fa’afetai fa’amatalaloto i le mataupu. Fa’amagalalo i matou uma ma fesoasoani mai i le sauniga o lenei aso. E ala ia Iesu. Amene.

MANUIA LE TAPUA’IGA O LENEI ASO SA.

ASO SA FEPUARI 15, 2026

MATAUPU: LOTOGATASI I FINAUGA.

TUSI FAITAU: NE’EMIA 4:1-6

SINI: Ia malamalama tamaiti i le tāua o finauga, ‘aia le finauvale, a ‘ia finau i le amiotonu ma lotogatasi i le fa’atuatua.

FESOASOANI MO LE FAIAOGA: Sa’o a e lelei le Ali’i, malo le usu, e ui lava ‘ina fa’atūtū gatā le taeao ‘ae iai a le lagona o lo’o maua pea le malosi fa’afou mo le tatou aoga. Tautuanā ia lava se taimi e sailiili ai mo sau fa’asoa matagofie o la tatou mataupu, ‘aua ne’i tau ā ‘ina ta’u atu i fanau mea o lo’o tusia i le tusi, o nai motugā manatu e fesoasoani atu ai i le fa’asoa. Manuia tele le fa’asoa atu i fanau mo lenei taeao.

FESOASOANI MO LE MATAUPU: Ua soloia pa o Ierusalemā, ua mana’omia le toe atiina ‘ae, lea ua taumafai sā Iutā e ati le pa, peita’i, ua fa’alavelave ane Sanepalata. Ua tigā lona loto ma tauemu ane i sa Iutā, ua ia fa’apea atu i itu taua a Samaria; Se ā le mea ua faia e nei tagata vaivai o sa Iutā? Upu fa’amaualuga nei manatu, e le’o aumaia ai se ata o se filemu. O le tatalo lea a Ne’emia ia tumau loto o le nu’u i le galuega, e pei fo’i ‘ona vaaia i le fa’alavelave a Sanepalata ma Tovia, ua manatu o ma’a ia e fa’aaogaina o faupuega otaota ua susunuina. Peita’i, o lo’o tumau pea ona fa’aauiaina la latou galuega, o le toe atiina a’e o pa o le a’ai. Ua finau pea e fa’aauiaina le galuega, e ui a i le tele o i latou sa tete’e pea a’o lo’o tumau lo latou fa’atuatua e toe fausia pā o le a’ai ua fa’aleagaina. O lo latou loto malosi i le tumau i le fa’atuatua pea na lē mafai ai lo latou naunau e atiina a’e le pā. O la latou tatalo fo’i lea ia maua le lotogatasi e finau malosi ai mo le fa’amoemoe e fia fa’aauiaina. O le fa’amalosia’uina lea e le tusitala o le tusi o Ne’emia le maua o le loto ma le tasi i finauga, ua latou finau malosi ai ma taumafai e atiina a’e pa mo le a’ai. O le ata fo’i lea e tupu i le ola o tagata fa’atuatua ma tatou fo’i ia tumau i finauga ia lotogatasi uma ‘aua le tete’e e pei o le tele o tagata o lo tatou vaitau. Fanau o se fa’amalosi fo’i lea mo tatou fanau, soia le finau vale, fa’alogo ma usita’i i matua ma ē matutua, aemaise auauna a le Atua. Tatou fa’amalolosi e lotogatasi i finauga, finau i le mea tonu ma le mea sa’o, mea uma e viia ai le Atua ‘ae lē o le tagata.

TAULOTO: Ne’emia 4: 4, 5

GALUEGA FA’ATINO: Manaia le fa’asoa fa’atasi o fanau, vaelua lelei le vasega, va’ai lea o tagata tete’e i finauga ma le vaega o tagata e tumau i finauga. Ia manino le fa’asoa, po’o leā se tāua o le tumau i fa’aiuga?

A’OA’OGA: O nai A’oa’oga ia ua mafai ona maua mo le fa’asoa e manatunatu pea iai.

1. Ia fa’amuamua le Atua i finauga uma ‘ina ia lotogatasi uma loto.
2. O le finauvale e lē maua ai se filemu lelei.
3. A maua le lotogatasi, e maua fo’i le fiafia i le Ali’i.
4. Tumau i le tatalo auā o le toaga e tatalo e tali mai lava le Atua i manaoga uma.
5. Faia mea uma ma le fa’amoemoe i le Atua e maua ai manatu lelei.

PESE: Pese ma Viiga (Pese 181)

TATALO: Fa’afetai le Atua mo le fa’asoa o lenei taeao, ia maua pea manatu mo le tala sa matou fa’asoa ai. Tumau mai i luga o lau fanau uma lou filemū, fa’atasi mai i le tapuaiga nei ma fa’amagalo i matou. E ala ia Iesu le tatalo. Amene.

MANUIA LE ASO SA.

ASO SA FEPUARI 22, 2026

MATAUPU FA’AMANATU

FESOASOANI MO LE FAIAOGA: Malo le usu seu i lenei taeao, talitonu ‘ua maua se fa’asiligā malosi o lau susuga auā le tapenaina o le tatou mataupu fa’amanatu o lenei masina. Fuafua pea e lau susuga le faiga o le fa’amanatu, tāua fo’i le fai o sina review pu’upu’u ‘ina ‘ia manatua e fanau a tatou mataupu. O nai fesili na e fesoasoani ia te oe auā le faiga o lau suega. Manuia le fa’amanatu i fanau.

FILIFILI LELEI NI FESILI MO LE SU’ESU’EINA O FANAU MO LENEI SUEGA.

FESILI MA TALI!

1. Fesili: O ai na tusia le tusi o Galuega?

Tali: O Luka po'o le Foma'i.

2. Fesili: Aisea e tāua ai igoa o i latou sa fai ma aposetolo e tala'i le talalelei?

Tali: E tāua auā e iloa ai i latou e tagata o lo'o tala'iina ai.

3. Fesili: O ai le igoa autu o lo'o naunau le 'au aposetolo e tala'i atu?

Tali: O le suafa o Iesu.

4. Fesili: O le ā le tāua o Iesu na mafua ai ona tala'iina?

Tali: Manatua Iesu na foa'i mai lona soifua na lilifa iai lagona o tagata ona o le fa'aolataga.

5. Fesili: O ai fo'i le isi aposetolo na auina i Anetioka e tala'i le Ali'i?

Tali: O Panapa.

6. Fesili: O ai lea e manatu Ruta e tausi iā Naomi?

Tali: O Poasa.

6. Fesili: Aiseā ua manatu ai Ruta e toe fo'i Naomi i lona nu'u?

Tali: Ona ua le toe maua e ia se isi tama e faiavā ia Naomi, ua oti lana tane.

7. Fesili: O le ā le fa'atoaga a Poasa o lo'o galue ai?

Tali: O le togā karite ma le togā saito.

8. Fesili: O le ā le tala a Ruta ia Naomi e fai atu ia Poasa?

Tali. O a'u o Ruta lau auauna fafine; fa'aafu mai ia lou pito ofu i lau 'auauna fafine, auā o iā te oe le tausi tama.

9. Fesili; O ai fo'i le igoa o le isi tama teine a Ruta na alu ese i lona mana'o?

Tali: O Orepa.

10. Fesili: O ai fo'i le isi igoa o Ruta?

Tali: O Mara.

11. Fesili: O le ā le galuega a Ne'emias na mana'o iai mo le nu'u?

Tali: O le fausia'ina o le pā.

12. Fesili: O ai lea na fa'alavelave i le galuega?

Tali: O Sanepalata.

13. Fesili: O le ā le mea ua fa'atusa ai e tagata tete'e ma'a ua atiina a'e ai le pa?

Tali: O faupuega otaota 'ua susunuina.

14. Fesili: O le lotogatasi e mafua mai fea?

Tali: E mafua mai le loto lelei o le tagata, a'o le loto lena e mafua mai le Atua.

15. Fesili: O le ā le mea sa laualuga iā Ne'emias na matele iai lona loto?

Tali: O le tatalo.

MANUIA LE AGA ATU MO LE TAPUA'IGA FAITELE I LE ATUA.

ASO SA MATI 01, 2026

MATAUPU: PERITOMEINA O LE FATU MONI.

TUSI FAITAU: ROMA 2:17-30

SINI: Ia manino tamaiti i le uiga o le peritomeina o le Tulafono mo Isaraelu, o le tino lenā, 'ae manatu lava Paulo o le peritomeina o le mea e patino i le Agaga.

FESOASOANI MO LE FAIAOGA: Malo le sopo, fa'afetai onosa'i mo le a'oa'oina o fanau, manatu ua maua se malosi fa'asili mai le Atua. O le mea tāua o le maua o le agaga e tufa ai i fanau la tatou tala, ma ia maua fo'i le augōfie e su'esu'e ma iloa pea le tāua o le sa'ili'ili i afioga ola a le Atua, auā se fa'asoa mo fanau. Manuia le fa'amatalaina o lā tatou mataupu fa'ailoa.

FESOASOANI MO LE FA'ASOA: Ua manino le tala sa faitauina mai le tusi o Roma, mataupu lea e lua o lo'o aumaia ai le; 'Aua le fa'amaualuga nisi auā o le fa'amasinoga tonu a le Atua e o'o i tagata uma. Ua fa'amanino le tu ma aga a le Iutaia, e fa'alagolago i Tulafono, ma ua manino i tu ma uiga eseese, auā ua tamau pea i Tulafono. Lea lava e manatu i latou i a'oa'oga ma ua fa'atusa o ē ta'ita'i i tauaso, ma e oi le pouliuli, atoa ma tamaiti aua o le tino ma le poto o le upu moni i tulafono uma. O le manatu lava o Iutaia o le peritome o le vaega a le tino, a'o le fesili tele lea e manatu ai Paulo; Aisea e le manatu ai i le taumafai e a'oa'o e le Iutaia le Iutaia? O le tu masani o le mitamita i le Tulafono, ua fai ma ala e upuleaga ai i le Atua outou o i nu'u ese. O le manatu o Paulo e aoga le peritome mo ē le talia le peritomeina, tagata faifai i le Atua, ua manatu i latou e tapua'i i o latou lava atua ese. Ua latou a'oa'o le Iutaia lea i tagata ese 'a 'ua le mafai lava 'ona a'oa'oina i latou e i latou lava. Lea ua manatu i Tulafono, auā o Tulafono lea e ola ma tamau ai, ua talatala tulafono uma 'ae silimusa iā te'i latou le soli ma lē 'ana'ana iai. Le malosi lenā lea e fa'amanatu e le aposetolo i le ekalesia i Roma. Manaia lana tu'ualalo; Aua ua fa'apei ona tusia; "Ua upuleagaina le suafa o le Atua talu outou i nu'u ese." O lona manatu fo'i; "E aoga le peritome, pe afai e te 'ana'ana i le Tulafono; 'ae afai e te soli i le Tulafono, 'ua aveai ai lou peritome ma fa'alēperitomeina." O le fatu manava lenā lea e manatu ai Paulo; O le Peritomeina o le mea patino i le Agaga, seā le aoga e peritome ai 'ae lē manatu mamafa i le Atua, lana fa'amasinoga tonu e tatau lava ona mata'itū pea, ola ma tumau ai. Ua ia fa'amalosia fo'i; Auā e lē o le Iutaia lē ua vaa'ia, e lē o le peritome fo'i lē 'ua vaa'ia i le tino; 'ae peitai, o lē ua le vaa'ia, o le Iutaia lava lea, o le peritome fo'i 'ua i le loto lea, o lo'o i lā le agaga lea, e lē o i lā le tusi, o lona viiga e lē mai tagata, 'ae mai le Atua." O le mea fo'i lea e tatau ona mata'itū fanau, soia le fa'amasino atu i tagata, tu'u pea i le Atua lana fa'amasinoga tonu. O le peritome o le mea patino a le Iutaia, a'o tatou tatou fa'alagolago i le Agaga e pei ona aumaia e le aposetolo, tumau pea i le Atua, soia le manatu i atua ese, o atua mamate nā, e leai sa tatou mea e maua ai.

TAULOTO: Roma 2: 28, 29

GALUEGA FA'ATINO: Manaia le fa'asoa pea i le mataupu i le peritome fa'a le tino e pei ona manatu iai Iutaia, ma le peritome fa'a le agaga i le manatu o Paulo.

A'OA'OGA: O NAI A'OA'OGA E FA'APOOPO I A'OA'OGA UA MANATU IAI LE FANAU.

1. 'Aua tatou te fa'amasino atu i tagata, o le fa'amasinoga o le mea patino a le Atua.
2. Manatua le Atua e fa'amuamua i o tatou loto, 'ae soia le manatu i atua mamate.
3. Tatou mafaufau i Tulafono ua tu'uina mai e le Ali'i, 'ae aua le manatu i le Tulafono tamau a le Iutaia.
4. Fa'aa'oa'o pea i lagona o le aposetolo, 'ia tumau i le peritome fa'a le Agaga.
5. Ia 'ana'ana i le Tulafono o le aogā lenā o le ola peritomeina.

PESE: Pese ma Viiga (Pese 182)

TATALO: Fa'afetai le Atua ua mae'a la matou fa'asoa o lenei taeao. Fa'amatala loto pea ma mafuta mai e ala i lou Agaga e tumau ai o matou loto ia te oe. Fa'amagalo i matou e ala ia Iesu le tatalo.... Amene!

IA MAU PEA LOTO I LE ATUA.

ASO SA MATI 8, 2026

MATAUPU: TAUNU'UGA O LE AGASALA.

TUSI FAITAU: 2TUPU 17:3-23

SINI: Ia malamalama fanau i le lē lelei o le agasala, auā e iai lava lona taunu'uga e pei ona tupu i le nu'u o le Atua, e pei fo'i lā o'i tatou pe ā fiafia pea e fai le agasala.

FESOASOANI MO LE FAIAOGA: Malo le usu, fa'afetai le fa'atoatoa i feau ma galuega o lenei taeao fou. Tāua lava le sailiili i le tatou mataupu fa'asoa, o lenei taeao manatu fo'i e lelei lava le faitau pea o le Tusi Paia e faigofie ona fa'amalamalama atu ai i fanau le tatou tala. Manuia le fa'asoa o lenei taeao.

FESOASOANI MO LE MATAUPU: O lea lava e fa'aauau le tala i augā tupu o Isaraelu, o le faitauga o lenei taeao; "O le fa'atafunaga o Samaria" Ua alu a'e le tupu o Asuria i le nu'u uma o Samaria ma 'ua ia si'o i le a'ai, 'ao fai Hosea ma tupu i tausaga e iva. O le vaitaimi tonu lea na o'o ane ai le tupu o Samaria ma a'ea le a'ai, ma 'ua na fa'atafea Isaraelu i Asuria, ma 'ua tu'uina atu i te'i latou i Hala ma Havoli, e lata ane i le vaitafe o Kosane, atoa ma le a'ai o Metai. O nei mea ua tutupu i le fanauga a Isaraelu, 'ina ua agasala i latou i luma o lo latou Atua sa auina ane i latou mai lima o Farao le tupu o Aikupito ma 'ua latou fa'agalo le Atua 'ae tapua'i i atua ese. Ua lē manatua le Atua a 'ua savavali i tū ma aga a nu'u ese, o nei mau manatu ua tupu ma 'ua fa'alilolilo i ō latou manatu mea e lē tusa ma le finagalo o lo latou Atua. Ua latou faia taulaga i nofoaga mauualuluga, ua fa'ateleina le mau leoleo i a'ai, ua latou fa'atuina tupua o Asaira i luga o mea mauualuluga ma lalo o la'au lauolaola uma. Ua fa'aa'oa'o i tū ma aga a tagata o nu'u ese, ua fa'amū mea manogi i nofoaga maualuga, ma 'ua latou fa'a'ono'ono i le Ali'i lo latou Atua. Ua latou ifo ma 'au'auna i tupua, ua lē fa'alogo i le fetalai mai o le Ali'i; "Aua tou te faia lea mea" ua auala mai a'oa'oga a le Ali'i e ana perofeta ma tagata va'ai uma, ua ia fetalai mai; "Ia outou liliu mai i ō 'outou ala leaga, ma 'ia outou tausisi i a'u poloa'iga ma 'au tulafono uma na ou poloa'i atu ai i ō outou tamā, na 'ou tu'uina atu ai fo'i i ō outou e 'au auauna o le 'au perofeta." Talofa e leai lava ma se tasi na fa'alogo ma usita'i, 'ua fa'ama'aa pea i ō latou ua e pei ona faia e ō latou tamā, o ē na lē talitonu i le Ali'i le Atua. Ua latou fa'agalogalo le feagaiga na osi ma ō latou tamā i le amataga, atoa ma Tulafono uma na ia fetalai mai ai i ō latou tamā anamua. Talofa ua se'e ese lo latou talitonuga, ua le 'ana'ana i le Ali'i, ua aveese'ina fo'i Isaraelu mai le aiga o Tavita, ma 'ua fai ai lea o Ierepoamo le atali'i o Nepata, ua fai ma sasa iā Isaraelu ne'i o latou mulimuli i le Ali'i, ma ia fa'atupu iā te'i latou le agasala tele. Ua latou mulimuli i agasala uma a Ierepoamo, ma 'ua latou le te'a ese ai lava. Ua tu'ueseina e le Ali'i iā Isaraelu, e tusa ma lana afioga i ana auauna uma le 'au perofeta. O le mafuaaga lena na fa'atafea ia i latou i Asuria se'ia o'o mai le asō. Fanau e leaga le lē usita'i, ia tumau lo outou usita'i i matua 'ae sili ai ona usita'i i le Atua.

TAULOTO: 2Tupu 17: 22, 23

GALUEGA FA'ATINO: Manaia 'ae fa'asoa pea i le fa'aauauina o le mataupu, vaelua lelei le vasega ia maua ni vaega tututsa se lua, o le isi vaega e tete'e a'o le isi vaega e lē tete'e. Ia maua se debate manaia o lenei taeao.

A'OA'OGA: O NAI A'OA'OGA MO LE TALA, ATONU E IAI FO'I NISI A'OA'OGA E AUMAIA E FANAU.

1. 'Aua le tofia e fai ma tupu ona lē manatu lea i lē na vala'auina i tatou.
2. E leaga le lē usita'i i le Atua, auā e i'u lava i le fa'asalaina.
3. Tāua le fa'alogo auā o le fa'alogo, e sili i lō le ga'o o le mamoe po'a.

4. E manuia mea uma pe ā usita'i ma fa'amaoni i le Atua, ma e tupu ai pea le ola fa'atuatua.
5. Ua atagia iinei le vaa'iga fa'a Teuteronome, a amio lelei e fa'amanuia, 'ae a amio leaga e fa'asala.

PESE: Pese ma Viiga. (Pese 370)

TATALO: ua manino tala o lau afio le Atua e ala i la matou fa'asoa. Fa'amalamalama mai ma ia maua e i matou uma le filemu o lau afio, ma fa'amagalalo i matou i mea uma 'ua matou faia. E ala ia Iesu le tatalo. Amene.

MANUIA LE ASO SA.

ASO SA MATI 15, 2026

MATAUPU: O LE FALE FILEMŪ O LE AGAGA.

TUSI FAITAU: FA'AALIGA 1:1-13

SINI: E tauā le fa'amoemoe i le musumusuga a le Agaga, auā o mea uma e fa'aalia o mea lava e aumaia e le Agaga mo le tagata fa'atuatua i le Atua.

FESOASOANI MO LE FAIAOGA: Fa'afetai onosa'i i galuega fa'atino mo lenei taeao auā la tatou aoga Aso Sa. O le fa'amanatu masani lava, ia tautuanā lau tapenaga mo la tatou mataupu tāua lava le tulituliloa o le su'esu'e pea ina ia maua e fanau le tāua o tala o le Tusi Paia. Fa'afetai alolofa i fanau a le atunu'u, o nai motugāafa na e fesoasoani i lau fa'asoa. Manuia le fa'asoa pea.

FESOASOANI MO LE MATAUPU: O le tusi o Fa'aaliga, o le tusi ua molimau le 'au atamamai o le feagaiga fou, o le tusi i mea o lo'o taoto i le lumana'i (vision) le tusi faimai o le fa'aaliga i le miti iā Ioane, le sa fa'aaunu'ua i le motu o Patamo. O lana tusi atu i ekalesia e fitu oi Asia itiiti, o fa'aaliga na tu'uina iā Ioane, e le agelu a le Atua auā o ia sa molimau i le afioga a le Atua. O lana tusi atu i ekalesia e fitu, oi Asia, na ia matuā tala'iina atu, ia iā te outou le alofa tunoa ma le manuia mai le Ali'i o lo'o soifua, na soifua fo'i, o le a afio mai, ma agaga e to'afitu oi luma o lona nofoali'i. Fai mai nai iā Iesu Keriso o le molimau fa'amaoni, o le ulumatua o ē ua oti, ma le pule i tupu o le lalolagi. Ioane lea 'ua molimau i ekalesia e fitu. O lana tusi atu i ia ekalesia, o le fa'aaliga o Keriso, o lana ta'utinoga na ia manino ai o lo'o iai fa'atasi ia ma Keriso i le Agaga atoa ma lona onosa'i a'o i Patamo 'ona o le afioga a le Atua ma le mau ia Iesu Keriso. Na ia manatu ua ia i le Agaga i le aso o le Ali'i, o iinei na molimau ai Ioane i ona tua pei o se pū ua leotele ma fa'apea mai iā te ia; "O mea e te vaa'ia 'ia tusi i se tusi ma ave atu i ekalesia e fitu o Efeso, ma Semurana, ma Perekamo, ma Tuatira, ma Sarataisa, ma Filatelefaia, ma Laokitaia." O ekalesia la'ia na ia tusi atu ai, a'o mea na ia iloa ma vaa'ia ma ua toe vaai atu i tua i le leo na tautala mai ia te ia; na iloa atu ai e Ioane tu'ugāmoli auro e fitu. O fa'aaliga ua ia vaai atu iai o lo'o i totonu o ia tu'ugāmoli e fitu le tasi e pei o le atali'i o le tagata, 'ua ofu i le ofu tātapuvae, ua fusia fo'i lona fatafata i le fusi auro. O lana molimau i le fa'aaliga o Iesu, le ata lenā lea ua ia iloa atu, ua sinasina fo'i lona ao ma ona lauao e pei o le fulufulu mamoe 'ona sinasina, e pei o le kiona lava; ma ona fofoga e pei o le mūmū o le afi. O le mea lena na ia fa'atalofa atu ai i Ekalesia e fitu, ma ia fa'ailoa e afio mai o ia i ao ma e iloa atu o ia e mata o tagata uma atoa ma ē natu'ia o ia; e taufaitagitu'i ituaiga uma o le lalolagi 'ona o ia. Le Iesu lenā lea ua fa'aali iā Ioane ua ia fa'ailoa atu lona Agaga e lavea'i ma fesoasoani mai i ituaso uma o le olaga. Tāua fo'i lea mo tatou fanau le tatou o atu e tala'i lona finagalalo mo le tagata 'ina 'ia tupu ma olaola pea i lenei soifuaga tatou te ola ai ma tumau ai. Fai pea i tatou ma ave feau o le talalelei i aso uma a'o maua lo tatou malosi.

TAULOTO: Fa'aaliga 1: 10, 11

GALUEGA FA'ATINO: FESILI FA'ATUPU MANATU.

1. O fea sa iai Ioane i le taimi na ia iloa ai fa'aaliga?

Tali: Sa i le motu o Patamo.

2. O le ā fo'i le uiga o le tusi o Fa'aaliga?

Tali: O mea o lo'o taoto i le lumana'i. (Vission)

3. O ai fo'i lea e tusi iai Ioane?

Tali: O ekalesia e fitu i le atu Asia. (E mafai fo'i ona ta'u uma igoa o ekalesia)

A'OA'OGA: O nai a'oa'oga e tu'ufa'atasi ma a'oa'oga ua maua a le fanau.

1. E tāua fo'i le fa'alogo i le musumusuga a le Agaga e tupu tele ai le fa'atuatua.
2. Tāua le matau o ata fa'a fa'atusa o lo'o aumaia ai le finagalo o le Atua.
3. Ia fa'alogo i le Ali'i auā o ia e tatau 'ona fa'alogo ma usita'i iai.
4. Tumau i le fa'atuatua e atili mausalī ai le talitonu i mea e lē vaa'ia.
5. O Fa'aaliga a le Agaga e tatau ona mata'itū pea, auā e iai lava se aso e fa'aali mai ai.

PESE: Pese ma Viiga (Pese 110)

TATALO: 'Ua i'u la matou mataupu, fa'afetai le Atua fa'amalamalama mai ma ia e fa'amagalo i matou uma ma fesoasoani mai. E ala ia Iesu le tatalo, Amene.

MANUIA LE TAPUAIGA FAITELE.

ASO SA MATI 22,2026

MATAUPU: VI'IGA O LIMA MA LE FATU.

TUSI FAITAU: MATAIO 26:1-16

SINI: O viiga o le tagata e onomea pe ā fa'amoemoe i le Ali'i, 'ae le faia i le mea e mana'omia e le tagata lava ia, viia le Atua 'ae lē o le viia o se isi ā mea o le ola nei.

FESOASOANI MO LE FAIAOGA: Fa'afetai galulue malo le fa'atoatoa, i feau ma galuega o lenei aso. Tāua lava le faitau pea o le Tusi Paia ma fa'amasani tamaiti i le fiafia e faitau. Tu'u lava iai le avanoa e faitau ma malamalama pea i uiga o upu o le faitauga. Ia maua se fa'asoa lelei mo au tapenaga o le tatou mataupu. Manuia tele le tapenaga ma ia fiafia lava i le Ali'i.

FESOASOANI MO LE MATAUPU: O le tatou mataupu o lenei Aso Sa o; Viiga o Lima ma le Fatu; O le ā se galuega a lima, o mea e malie ai lima 'ae manatu lava e faia ma le fatu, e atagia i le malie atoa o le loto. O lo'o aumai e le tatou mataupu taupulepulega leaga e fa'asaga iā Iesu, fa'atoā uma atu le fa'amasinoga mulimuli o le Ali'i. Ua fa'ai'u ana upu ma ua ia fa'apea atu i lona 'au so'o ma fa'ailoa atu iā te'i latou; A mavae aso e lua ona fai ai lea o le paseka e tu'uina atu ai le atali'i o le tagata 'ina 'ia fa'asatauroina. O ia ona po na fa'apotopoto ai le 'au ositaulaga sili ma toeaina o le nu'u i le fale o le ositaulaga sili o Kaiafa, ma 'ua latou tau pulepule i se mailei e pu'e ma fasioti ai Iesu. Ua latou manatu e 'aua le faia se tausamiga ne'i fa'anunununu ai le nu'u. Ua i Petania o ia i le fale o Simona le lepela, o iinei na sau ai le fafine ma le fagu alapasa e u'uina ai Iesu, o le fagu magoni tele ma ua ia liligi i luga o a'ao o le Ali'i a'o taoto ia e taumafa. O iinei sa le fiafia ai le 'au so'o ma latou fai ane; Se ā le mea na fa'amauamauaina ai lenā suau'u ana ave e fa'atau atu ua tele ni tupe ma foa'iina atu ai i ē matitiva. Na fa'ateia i latou 'ina ua fetalai atu Iesu; Aisea 'ua outou fa'alavelave ai i lenei fafine? O le mea lelei ua na faia iā te a'u. Tou te nonofo pea lava ma tagata matitiva a'o ia latou te le nonofo pea ma ia. O le fa'ailoga lenei 'ua ia faia e fa'ailoa atu ai le fa'ata'imuaga o le tanuga o le Ali'i. Ua silafia e Iesu o nu'u uma o le lalolagi e auina atu iai lenei tala lelei e ta'ua ai le mea ua faia e lenei tinā, ma e fa'amanatu ai lea mea iā te ia lava. O le tāua lenei o lana galuega sa faia mo lona Ali'i, o le fa'aaliga o mea o le a tutupu i le Ali'i e ala i lona maliu 'ina 'ia tatou saofagā ai i lona malō e fa'avavau. Tāua tele lea va'aiga

fanau o se mea tāua fo'i lea e tatau ona tatou faia e ta'uaogāina ai la tatou auaunaga i luma o le Atua. Ia faia mea uma ma le Fatu.

TAULOTO: Mataio 26: 7, 10, 12

GALUEGA FA'ATINO: Ia fai ni fesili e iloa ai po ua malamalama tamaiti ma e aogā fo'i e fa'asoa atili ai i le mataupu. Tāua fo'i le talanoa i le galuega lelei na faia e le tinā ma lana fagu alapasa.

A'OA'OGA: O nai a'oa'oga mo le tatou tala nsa fa'amatalaina e tu'u fa'atasi ma a'oa'oga a le fanau.

1. 'Aua le manumanu i se mea 'ua ofo atu mo le Ali'i.
2. Ave uma i le Ali'i se mea ua totoe i lou ola.
3. A iloa le mea e tatau ona fai, fai loa 'ae 'aua le fa'atali.
4. Aua le manatu i se tupe 'ae manatua le Ali'i ma lona alofa.
5. E leaga le tau lamalama 'ae sili ona maua pea le alofa i so'o se tagata.

PESE: Pese ma Viiga (Pese 94)

TATALO: Malo fa'afetai le Atua, ua maua manatu lelei o lenei taeao, fa'atasi mai pea lau Afio i sauniga uma ma fa'amagalo i matou e ala ia Iesu le tatalo. Amene.

E LELEI LAVA LE ALI'I.

ASO SA MATI 29, 2026

MATAUPU FA'AMANATU

FESOASOANI MO LE FAIAOGA: Malo le onosa'i i lau susuga a le faiaoga fa'afetai fa'amalosi i le tulaga fa'a faiaoga. Ua tatou iai i lenei taeao o le su'esu'eina o fanau e ala ia tatou mataupu fa'atino. Tāua lava le fa'amanatu pea i fanau a tatou mataupu o lenei masina, ona fa'auauina ai lea o le suega. Malo le lototele, ma lenei aso ma ona taualumaga uma.

TAPENA LELEI PEA E LAU SUSUGA SE SUEGA MO FANAU:

FESILI MA TALI!

1. Fesili: Se mea tatau le fa'amasino atu o le tagata i le isi tagata?

Tali: Leai, o le fa'amasinoga o le mea patino i le Atua.

2. O le ā le mea e matele iai le 'au Iutaia?

Tali: O Tulafono.

3. O le ā le tū lea e manatu Paulo e fa'amalosi e le Isaraelu?

Tali: O le Peritomeina.

4. O ai e maua ai le ola, o atua na fausia e tagata po'o le Atua pule aoao?

Tali: O le Atua pule aoao.

5. O le ā le mea o lo'o tupu i le tala sa faitauina?

Tali: O le fa'atafunaga o Samaria.

6. O ai fo'i le tupu o Samaria i le vaitau lea?

Tali: O Hosea.

7. O le ā le mea ua tupu i le nu'u i lea vaiatau?

Tali: Ua lē fa'alogo i le Atua.

8. O ai le tupu sa latou ta'ita'i sesēina Isaraelu 'ina 'ia 'aia ne'i mulimuli i le Ali'i?

Tali: O le tupu o Ierepamo le atali'i o Nepata.

9. O ai e fa'amoemoe iai le tagata 'ina 'ia fesoasoani mai iā te ia?

Tali: O le Agaga o le Atua.

10. O fea sa iai Ioane na fa'aali ai le fa'aaliga ia te ia?

Tali: O le motu o Patamo.

11. O le ā le fa'aaliga na ia vaa'ia?

Tali: O le tusi mo ekalesia e fitu i le atu Asia.

12. O le ā fo'i le mea na vaai iai Ioane?

Tali: O Tu'ugāmoli auro e fitu, ma le tagata o lo'o tu mai ai i totonu.

13. O le ā le mea ua manatu le fafine e ave mo Iesu?

Tali: O le fagu alapasa e u'u ai vae o Iesu.

14. O le ā le manatu o le 'au so'o i le mea na faia e le fafine?

Tali: Ua maimau le u'u, ana ave e fa'atau ua tele ni tupe ma le 'au matitiva.

15. Na fiafia iai le Ali'i i lo latou manatu?

Tali: E leai, fetalai le Ali'i tou te mafuta ma tagata matitiva a'o a'u nei tou te le toe vaa'ia.

16. O le ā le ata lea ua fa'ailoa e le fafine?

Tali: O le u'uina o a'ao o le Ali'i mo lona tanuga.

17. O ai lea ua ave iai Iesu i ona luma?

Tali: O Kaiafa.

MANUIA LE ASO SA MA LE TAPUA'IGA.

ASO SA APERILA 05, 2026

MATAUPU: I'UGA O LE OTI

TUSI FAITAU: MATAIO 27:1-10

SINI: Ia manatua fanau o le i'uga lava o le ola fa'alata o le oti, e pei fo'i ona faia e Iuta i lona fa'alataina o le Ali'i, soia le fa'alata ne'i maumau le ola.

FESOASOANI MO LE FAIAOGA: Malo le onosa'i i lau susuga a le faiaoga, malo le usu i feau ma galuega o le tatou Aoga Aso Sa. Manatu lava o lo'o iai pea le agaga e fa'aauau ai le galuega, tāua lava le faitau o le Tusi Paia ma sailiili i nisi o upu tāua oi totonu o le faitauga. Ia lava pea se taimi, e sailiili ai i la tatou mataupu. Manuia tele le fa'asoa atu i fanau.

FESOASOANI MO LE MATAUPU: Ua aumaia e le mataupu o lenei taeao, le tala i le tu'uina atu o Iesu i luma o Pilato. O le galuega a le 'au ositaulaga sili uma ma toeaia o le nu'u, ia fasioti iā Iesu. Fai mai 'ua latou noanoa iā te ia, ma ta'ita'i atu i luma o Pilato. Ua mata'itu pea e Iuta le na ia fa'alataina Iesu, ua feagai le Ali'i ma fa'asalaga talu ia. Ua salamō 'ua ia manatu e toe fa'afo'i tupe ia te'i latou, ma ia manatu ai; Ua ou agasala 'ina 'ua ou fa'alata i lē 'ua lē sala. Ua fai ane le 'au tusiupu ma toeaia, E lē sa matou mea lena? Faitalia lava oe. Ua alu ai Iuta ma lafo ana tupe i le malumalu 'a 'ua alu ma pule i lona ola. Ua filifili gatā i latou pe tatau 'ona tu'u ia tupe i tu'ugā oloa a le malumalu, ua latou manatu e leai, a ua filifili e fa'ataua ai fanua e tanu ai tagata ese ma 'ua ta'ua ai lenei fanua o le; "Fanua o le Toto". Manatua fo'i o upu uma nei na vavalu ai le perofeta o Ieremia; "Ua latou tago i tupe e tolugafulu, o le tau lea o lē na fa'atatauina, ma fa'atatauina e fanauga a Isaraelu; 'ona latou fa'atau ai lea o le fanua o le fai ipu omea, e pei ona fetalai mai ai iā te a'u o le Ali'i." O le leaga lenā o le ola fa'alata auā e i'u i le pule i le ola. Manatua fanau o le vaivaiiga fo'i lea o lo'o atagia i totonu o aiga, o nu'u, le malo ma le atunu'u, malosi le tele o le fai fua. Manuia le tala ma lona taunu'uga po'o ā lava mea e tutupu i le soifua ma le ola ma taumafai e taulamalama nisi, ma fai pea le tupe ma fa'asese ai lo tatou ola saili i le Ali'i, e le lelei ma e lē aoga. E leai sa tatou mea e maua ai, na'o le sili ai le oti i lo le ola.

TAULOTO: Mataio 27: 3-5

GALUEGA FA'ATINO: Tāua le fesili ma e tatau 'ona tali manino fanau i le fesili; "Aisea na manatu ai Iuta na te fa'alataina Iesu? Fa'asoa pea!

A'OA'OGA: O nai a'oa'oga ua filifili mo le tala, fa'aopoopo ane nisi a'oa'oga tapena e outou le fanau.

1. E lē lelei le ola fa'alata.
2. Aua le avea le tupe e fai ma auala e taumafai ai e faia se isi manatu sesē.
3. E le o le tupe e tāua, a'o le alofa atu.
4. O le fa'alata o lona lava i'uga o le oti.
5. E ala 'ona maua i le tau fa'aleaga 'ona o le mana'o tele.

PESE: Alofa i ou tuaoi a'o e malaga.

TATALO: Fa'afetai le Atua 'ua mae'a la matou mataupu fa'asoa o lenei taeao, leaga ia o le ola fa'alata. Fesoasoani mai 'ina ia mafai on tu'u ese, ma fa'amagalo i matou uma e ala ia Iesu. Amene.

IA FIAFIA PEA I LE ALI'I.

ASO SA APERILA 12, 2026

MATAUPU: O LE SAUNIA O LE ATUA IA FA'AMAGALO MA TOEFUATAINA.

TUSI FAITAU: MIKA 7:18-20

SINI: E tāua le pipi'i pea i le Atua, auā e leai lava se tasi e maua ai le malosi na'o le Atua lava. O Ia fo'i e magalo ai ā tatou agasala uma.

FESOASOANI MO LE FAIAOGA: Fa'atalofa atu i lenei taeao fou, malo le usu seu i feau ma galuega o lenei Aso Sa. Tāua lava lou silasila lelei i la tatou mataupu, ia maua tele se avanoa e sailiili ai i nisi metotia e fa'amatala ai le tatou mataupu i fanau. Ia lava se taimi e mata'itu ai le Tusi Paia ma finau ia sili atu lau tapenaga o lenei Aso Sa. Manuia le fa'asoa.

FESOASOANI MO LE MATAUPU: Ua aumai e le faitauga o lā tatou mataupu o lenei taeao, le tala a Mika, le perofeta o le valu seneturi. O le paū o Isaraelu, na fa'aosofia ai le perofeta ma vavalu i faigatā ma fa'afitauli o le ā o'o ia Iuta e pei fo'i sa valoia e le perofeta o Amosa iā Isaraelu, 'Ona o nei fa'avelave, o le Atua o le ā ia tau'i ma sui i tagata faimealētonu. E ui i nei mala, 'ae sa tautala pea le perofeta o le a iai pea fa'ailoga

va'aia o le fa'amoemoe ma le manuia o le lumana'i. O nisi o manatu o le perofeta o tusitusiga e iloa ai le Atua, o ia o le filemu o le lalolagi. A maitau lelei i le faitauga e pei ona aumaia fuaiupu e sefuluvalu e o'o i le fuaiupu e luasefulu. O lo'o aumaia pea e le perofeta le foliga fesili i le Atua e tusa ma lona fa'amagalo agasala, 'ina 'ua lē manatua solitulafono ā e o totoe o lona tofi. E lē toe fa'amoemoe i lona to'asā, 'aue e fiafia ia i le alofa, e tele pea lona alofa mai. E tumau lona alofa iā i tatou uma, e fa'ato'ilaloina e ia a tatou amioletonu, o ia fo'i e lafoa'iina a tatou agasala uma i mea loloto o le sami. Toe aumaia ai le ata o le feagaiga tuai, ua fa'ao'o le fa'amaoni iā Iakopo, o lona alofa iā Aperaamo o augā tamā o Isaraelu i le amataga. Lea lava e manino le tala atoa; Ua latou tagi 'ina 'ua to'aitiiti, 'ona saili ai lea i le Atua. Ua ese a le ata lea ua va'aia, ua le toe maua se nonofo filemu, ua femisaa'i, ua femisaa'i tinā ma tama teine, a'o tamā ma latou atali'i, lea ua toe manatu i vaitau a'o pulea le nu'u o Aikupito, peitai o nei mea uma e iai lava le agaga fa'amagalo o le Atua, ma o Ia fo'i e toe fuataina le nu'u ma ona tagata. E tumau pea le alofa o le Atua, e pei fo'i 'ona alofa ia Isaraelu auā o lona nu'u na ia filifilia, ma o iinei fo'i e le mafai lava ona fa'agaloina e le Atua le feagaiga na osia e ona tama, o Aperaamo, Isaako ma Iakopo. Fanau o le tāua lena o la tatou mataupu o lenei Aso Sa, e fiafia le Atua e fa'amagalo ma toe fuataina, auā e tele pea lona alofa.

TAULOTO: Mika 7:18

GALUEGA FA'ATINO: Tāua lava le fa'asoa i le upu ALOFA, po'o leā le eseesega o le alofa o le Atua ma le alofa o le tagata.

A'OA'OGA: O NAI A'OA'OGA E FA'APOPO I A'OA'OGA A FANAU MO LE TATOU MATAUPU.

1. E ese a le tāua o le pipi'i pea i le Atua auā o ia e maua ai le ola.
2. Manatua le alofa o le Atua, e telegese lona to'asā 'ae tele pea lona alofa.
3. O ā faigata e o'o mai, e toe fuataina e le Atua lo tatou ola saili atu iā te ia.
4. 'Aua le fa'avaivai auā e alofa mai pea le Atua iā i tatou uma lava lana fanau.
5. Soia le faia o le agasala, auā o le i'uga lava o le oti.

PESE: Pese ma Viiga (Pese 69)

TATALO: Fa'afetai le Atua 'ua uma la matou fa'asoa, fa'afetai mafuta mai ma ia fa'amagaloina a matou agasala uma. E ala iā Iesu la matou tatalo. Amene.

MANUIA LE TAPUA'IGA I LE ATUA.

ASO SA APERILA 19, 2026

MATAUPU: FA'AMAUALUGA A'O LE'I PAUŪ.

TUSI FAITAU: MAREKO 14:27-31, 66-77

SINI: Ia malamalama fanau i le leaga o le ola fa'amauualuga, auā o lona lava i'uga o le to'ilalo.

FESOASOANI MO LE FAIAOGA: Malo le onosa'i malo le ala usu i la tatou a'oga Aso Sa o lenei taeao. Tāua lava le tapenaga ma le sailiili i la tatou mataupu o lenei taeao. Faitau pea le tusi faitau, ma maua nisi metotia fou e fa'amatalalaina ai le tatou mataupu. E lelei fo'i le faitau pea o le Tusi Paia ma malamalama tamaiti i uiga o upu o lo'o i totonu o le tala. Manuia tele le fa'asoa atu i fanau a le ekalesia.

FESOASOANI MO LE FA'ASOA: O le tatou mataupu o lenei Aso Sa, o a'oa'oga a le Ali'i o Iesu; ua mamau mai e le faitauga i le mataupu lenei e sefulu ma le fa. O taupulepulega leaga e fa'asaga iā Iesu, lea e amata i le u'uina o Iesu e le fafine i le fale o Simona le lepela, o le fa'ata'imuaga o lona maliu. Soso'o atu ai ma le fa'alataina o Iesu e Iuta le Sekara, atoa ma le Paseka a Iesu ma lona 'au so'o, o iinei na fa'ailo ai e Iesu lona tago atu i le areto ma le uaina ua tofitofi ma tufa atu i lona 'au so'o. O le mea mataina auā sa mafuta ma le

Ali'i, o lea ua fa'aalia ma fa'ailoa e le Ali'i le fa'afiti a Peteru, ua fa'amanino lo latou tausuai uma i le Ali'i ma ia ta'uina atu upu ua tusia; Ou te taia le leoleo mamoe 'ona ta'apeape ai lea o mamoe, ua fa'ailoa fo'i lona muamua atu i Kalilaia, pe mavae lona toetu mai. Fa'ate'ia le Ali'i 'ina 'ua fai atu Peteru; E ui lava 'ina tausuai tagata, 'ae ou te le fa'apea lava a'u." Ese a lagona o le Ali'i, ua ia fetalai atu iā Simona; O lenei aso le po nei lava, a'o le'i vivini fa'alua mai o moa, e te fa'afiti mai iā te a'u. O iinei na maumaututū ai le tali a Peteru; Ou te le fa'afiti lava ia te oe, e tusa lava pe ou te oti fa'atasi ma oe. Ua fa'asolo le faitauga, ma ua fa'ailoa le fa'afiti o Peteru i le Ali'i, sa i lalo o le maota le tasi auauna fafine a le ositaulaga sili, ua iloa e ia Peteru sa fa'amafanafana ma ia fa'apea atu ia te ia; O oe fo'i na lua fa'atasi ma Iesu le Nasareta. O iinei na fa'afiti ai ma ia fai atu, ou te le malamalama i le mea 'ua e fai mai ai. Ou te leiloaina lona tagata, ua sola i fafo i le fa'apaologa o le lotoā. Ma 'ua maitau pea e le auauna teine, ma ia fai atu o le tasi lenā o i latou. Ua atili fa'afiti lava Peteru, e le'i umi 'ae toe fai atu fo'i iā Peteru; E moni o oe lava o le tasi o i latou, auā o oe o le Kalilaia. Ua augani ane ma tautō; Ou te leiloa lava lenei tagata na o outou fai mai ai. Ua vivini fa'alua moa. Na manatua vave e Peteru le upu na fetalai ane ai Iesu iā te ia; "E lē vivini fa'alua moa, se'ia e fa'afiti fa'atolu mai iā te a'u." Ua lagona le mafatia ma 'ua matuā tagi lava. Ioe leaga ia o le ola fa'atasi 'ae fa'afiti, lē manatua le Ali'i, galo lona tautigā ma lona alofa. Sa nuti mea fa'atasi i le ola, a'o lenei ua fa'afiti ma lē taualoaina.

TAULOTO: Mareko 14: 31

GALUEGA FA'ATINO: Tāua le toe Iloilo i le Upu FA'AFITI, fesili i fanau po'o leā se tāua, po'o se lē tāua fo'i, manaia le fa'asoa i ni vaega se lua. Ia ta'utino fanau pe fia ni mea sa fa'afiti ma o'o iai?

A'OA'OGA: Tele ia o A'oaoga e mafai ona maua i le fa'asoa, a'o nai a'oa'oga nei ua maua.

1. Ia mafaufau mamafa i upu a le Ali'i, 'ae 'aua le tau ā 'ia faitau ane ai.
2. E lē lelei le ola fa'afoliga.
3. 'Aua le manatu mamā i lo tatou valaauina.
4. E lelei ā togafiti 'ae lē umi.
5. Tumau i a'oa'oga na aumaia e Iesu, 'ae 'aua le tau fa'alata.

PESE: Pese ma Viiga (Pese 39)

TATALO: Fa'afetai mo le fa'asoa, ma ia tumau pea i ō matou lotou uma nei. Fa'amagalo i matou ma ia mafutaina e ala i la matou sauniga i lau Afio. Amene.

VIIA PEA LE ATUA I MEA UMA.

ASO SA APERILA 26, 2026

MATAUPU FA'AMANATU

FESOASOANI MO LE FAIAOGA: Ua tatou iai i le fa'amanatuina o tatou mataupu o lenei masina, tāua lava le toe fa'amanatu i fanau a tatou faitauga o lenei masina. Ia manino i latou i tala sa fa'amatalaina, lelei pea le fa'ailoa iā i latou tusi faitau uma e fa'atino ai sa latou review laititi ona fai ai lea o la tatou su'ega. O nai fesili nā e fesoasoani i lau tapenaga 'ae tāua fo'i le faia lava e oe o nisi fesili. Manuia le fa'amanatu i fanau.

FESILI MA TALI!

1. Fesili: O ai fo'i le igoa o le tagata na ave iai Iesu e fa'amasino?

Tali: O Pilato.

2. Fesili: O ai le igoa o le so'o fa'alata o Iesu?

Tali: O Iuta.

3. Fesili: Aisea na filifili ai Iuta e toe ave ana tupe i le malumalu?

Tali: Ona 'ua ia iloa ua sala fua le tagata e leai sana sala.

4. Fesili: O le ā le mea na fai e Iuta iā te ia?

Tali. Sa pule lava ia i lona ola.

5. Fesili: O le ā le igoa o le fanua na tatanu ai tagata ese?

Tali: Fanua o le toto.

6. Fesili: O le ā fo'i le mea e tele i le Atua?

Tali: O lona alofa.

7. Fesili: O le ā le isi mea o lo'o fa'atusa iai le Atua e tusa ma le tala?

Tali: O Ia o le Filemu.

8. Fesili: Aisea e ta'u so'o ai Aperaamo i le tala?

Tali: Auā o ia o le uo a le Atua sa la osi feagaiga i le amataga.

9. Fesili: Aiseā na fetagisi ai le nu'u i le Atua?

Tali: 'Ina 'ua va'ai atu 'ua toa itiiti i latou.

10. O ai le malō lea ua manatu le tusitala ma toe manatua a'o iai le nu'u?

Tali: O Aikupito.

11. O le ā le saunoaga a Iesu i lona 'au so'o?

Tali: Ou te taia le leoleo mamoe ona taapeape ai lea o mamoe.

12. Fesili: O le ā le upu a Iesu iā Simona 'ina 'ua ia fa'afiti?

Tali: E le vivini fa'alua moa pē ā e le fa'afiti mai iā te a'u.

13. O le ā le tali a Simona 'ina 'ua fesili le fafine?

Tali: Ou te le iloaina lena tagata.

14. O le ā le manatu o Simona 'ina 'ua fa'afitia le Ali'i?

Tali: Ua salamō ma tagi.

15. O le ā le faiva o Simona a'o le'i filifilia e fai ma so'o o Iesu?

Tali: O le faifaiva.

MANUIA LE TAPUAIGA I LE ATUA.

ASO SA ME 03, 2026

MATAUPU: LE MAPUEA O IONA.

TUSI FAITAU: MATAIO 12: 38-50

SINI: Ia malamalama fanau i le uiga o le upu; mapuea, o faigata e maua ai le tagata e pei o Iona, o iina e lagona ai le i'uleo lea. E mapuea, pe afai o le a tulituliloa i fa'afitauli ma lē usiusita'i i le fa'atonuga e tatau ona fai.

FESOASOANI MO LE FAIAOGA: Ia iai pea le alofa le uma o le Atua i lau susuga a le faiaoga, malo le onosa'i i tiute ma faiva o lenei aso. Ia tumau pea le fiafia i le Ali'i, ma ia maua le loto tele e fa'asoa ai i fanau, ia iai pea le alofa o le Atua i fanau uma a le ekalesia. Tautuanā ma lau susuga le tatou mataupu o nai fesoasoani masani lava nā e fa'aopoopo i lau sailiiliga 'ina ia maua se fa'asoa tāua mo nai tamaiti. Manuia le fa'asoa.

FESOASOANI MO LE MATAUPU: O a'oa'oga tu'u fa'asolo a le Ali'i, lea ua fesiligia e le 'au faresaio ma le 'au tusiupu se fa'ailoga e fa'atatau iā te ia. O iinei na tali manino ai le Ali'i, e leai se fa'ailoga, manatua fo'i o itu aso faigata ia i le Ali'i. Ua aga atu i le fa'ailoa o mea uma ma le 'auga autu o lana misiona fai mai e i'u ā i le oti. Lea ua ia fetalai ma aumaia ai le tala iā Iona, o le lupe pe ā fa'amatalaina. O tala o le feagaiga tuai, lea ua toe lalaga ma fa'ailoa i le vaega lea, le mafuaaga o lana mapuea, ona o lona lē usita'i i le fa'atonuga a le Atua, e alu i Nineva a'o lona fefe na sola ai i Kasesa. Ua lē fa'alogu, ua fai lava lona loto ma ua manatu e le silafia e le Atua lana sola. Lea ua fa'amasino atu fia iloa se fa'ailoga, ua sau le tali e leai, 'ae 'ua toe fa'amanatu mai ai le ata fa'asolo i le umi na iai Iona i le manava o le i'a telē. Tolu po tolu ao, fa'atusatusa feagai a le Ali'i o taimi fo'i ia e tatau 'ona iai i le manava o le eleele. O le ata atoa lena na toe fa'amanatu ai ia tala, ma le fa'amasinoga 'ua o'o iā Nineva, o le fa'amasinoga lava lea e o'o iā i latou uma ia. O tagata uma nei na salamō i le tala'iga a Iona, a 'ua ia silafia e fai lava ana tala fa'afa'atusa a'o le mea mautinoa e sili atu lava ia nai lo Iona. E sili atu fo'i lona poto nai lo le poto o Solomona auā o le Atua na foa'iina le poto ia Solomona lea fo'i la e matuā sili atu ai o Ia iā Solomona. O tala e tau fa'amalamalama ai le 'au fia fa'amasino ma latou fesili tofotofu i le Ali'i. O le mea malie 'ona 'ua fa'atumuina i latou i le loto leaga, lea ua fofola fala ma fa'amanino e le Ali'i o le tagata e maua i lea ituaiga loto. E fiu lava e fia fa'amaoni 'ae tumau lava le loto eleelea, lea ua maua ai le tupulaga i vaitau o Iesu. O fa'aosoosoga tugā ia ua o'o lava i lo latou fa'ailoa pea lona tinā ma ona uso, ua tutū mai ma fa'atali i le Ali'i, peita'i, ua fa'amanino mea uma i lona fetalai atu; E le ta'ua sona tinā ma sona uso, se'i vagana lē ua faia le finagalo o lona tamā, 'ona ta'ua lea o ia o lona uso, o lona tuafafine atoa ma lona tinā. 'Aua tatou te manatu i le uiga o le upu mapuea, 'ae aoga le tulitulimatā gau pea o le tāua o lea fo'i lu'itau mo tatou fanau, e iloa lava le aoga pē a tatou fa'aa'oa'o iai.

TAULOTO: Mataio 12: 48, 49, 50

GALUEGA FA'ATINO: Aisea ua toe aumaia ai e Iesu le tala iā Iona ma lona lē usiusita'i i le Atua e toe lalaga mai fo'i le tala i lona maliu? Manaia le fa'asoa pea i le tatou fesili lea.

A'OA'OGA: O nai a'oa'oga e fesoasoani i fanau mo a'oa'oga ua maua i le tala.

1. E sa le sola a 'ia fa'alogu ma usita'i i le valaa'u mai a le Atua.
2. O le lē fa'alogu e leai sona uiga tāua i le ola o le tagata.
3. 'Aua le fefe i le oti pe afai o le Atua ua valaa'u mai, auā e malutia i tatou uma ia te ia.
4. 'Aua le fesili tofotofu pe afai o lo'o malamalama lelei i le mafuaaga e fesili ai.
5. Ia salamō ma usita'i e pei o Iona, auā o lona salamō na fa'aeaina ai.

PESE: Pese ma Viiga (Pese 355)

TATALO: Fa'afetai le Atua mo le fa'asoa mai e ala i lā matou mataupu, fa'amagalō i matou uma ma ia tumau i lau Afio e fa'avavau. Amene.

MANUIA LE ASO SA.

ASO SA ME 10, 2026

MATAUPU: TOMA LĒ TALITONU I LE TOETŪ. (ASO SA TINĀ)

TUSI FAITAU: IOANE 20: 24-29

SINI: Ia manino fanau i le leaga o le ola 'ae lē talitonu, e fa'avaivaia ai le ola fa'atuatua i le Atua.

FESOASOANI MO LE FAIAOGA: Tatou iai i lenei taeao fou, malo le usu ma le auai mai i le Aso Sa paia, tāua lava le fa'ataunu'u o tatou tiute fa'a faiaoga Aso Sa. Ia maua le agaga e faitau ai le Tusi Paia ma fa'amasani fanau i lea faiga. Manatua lau tapenaga ia maua pea manatu e fa'asoa ai i le mataupu, ma o nai fesoasoani na mo lau tapenaga 'ae fa'amautu ane lava e lau susuga se atoatoa e fa'asoa ai i fanau mo lenei taeao. Manuia le fa'asoa ma le Aso o tinā.

FESOASOANI MO LE MATAUPU: O le fesili autu o lenei Aso Sa; O a mai lou tinā? Manatu o lo'o malolōina lelei, a'o fanau ua motusia mafutaga ma o latou tinā, malo le onosa'i ma lava papale. Ua fa'amauiina e le 'au faievagelia le toe soifua mai o Iesu, na ulua'i iloa 'ina 'ua usu tinā i le tu'ugamau se'i ave mea magoni ma fuala'au e asi ai le tu'ugamau o le Ali'i. Na fa'ateia i latou 'ina 'ua taunu'u atu ua fuli ese le ma'a sa pupuni ai le gutu o le tu'ugamau. Ua toe o ie na 'au ai le Ali'i o lo'o tu'u mai totonu, na fa'ailoa agelu iā Maria le Makatala, ma la fesili iai po'o le ā le mea e tagi ai; Na ia tali atu, ua leiloa le mea ua latou ave iai le Ali'i, na fa'ate'ia i le vaai atu o Iesu lea ua savali ese atu. Na ia vave atu ma fa'ailoa i lona 'au so'o, 'ua na iloa le Ali'i 'ua toe tu mai nai le oti, ua fa'aali atu Maria 'ae le talitonu le 'au so'o, ma na i'u lava 'ina fa'ailoa atu iai le Ali'i ia te'i latou. Peita'i, o le tagata faigata lea ua feagai nei ma Iesu o le so'o o Toma, sa le'i iai i le taimi na fa'aali ane ai le Ali'i, o ia fo'i lea ua igoa iā Titumo. Ua fa'ailoa e le 'au so'o uma lo latou iloa atu o le Ali'i, sa lē faigofie 'ona talitonu Toma i lona fa'apea atu; A 'ou le vaai i ona lima na tutu'i i fao, ma tu'u lo'u tamatama'i lima i mea na tutu'i ai fao, ma tu'u lo'u lima i lona itu, ou te lē talitonu lava. O lea lava aso 'ina 'ua atoa aso e valu, na toe feiloa'i ai Iesu ma lona 'au so'o a'o iai ma le lē talitonu lea o Toma, na fetalai ai Iesu; Ia outou manuia. O iinei na fa'ailoa ai e Iesu iā Toma ona lima ma vae na tutu'i i fao atoa ma lona itū. Ua lagona e Toma lona fa'atuatua ma 'ua ia talitonu ma ia fa'apea atu; Lo'u Ali'i e, ma lo'u Atua e. Ua manino Toma ma 'ua fetalai atu Iesu; Toma e, ua e fa'atuatua ina 'ua e vaai mai iā te a'u, Amuia o ē le vaai mai 'ae fa'atuatua mai pea. O le ata fo'i lea fanau tatou te tali atu ai i o tatou matua atoa ma le Ali'i. Ia tumau le fa'atuatua ma ia talitonu i mea ua faia e le Atua mo i tatou lana fanau.

TAULOTO: Ioane 20: 27

GALUEGA FA'ATINO: Fesili pea i fanau po'o a lagona o le ola lē talitonu e pei o le so'o o Toma? Po'o le ā fo'i le tāua o lenei tala mo le Aso Sa o Tinā?

A'OA'OGA: E tele pea a'oa'oga e maua a'o nisi ia o a'oa'oga e fa'amatala i fanau.

1. E leaga le lē talitonu i le Ali'i toetu.
2. Fa'atauā tinā ma lo latou fo'i sao i le tausiga o fanau.
3. Talitonu i tala 'ua aumai 'ae lē o le fa'a taliga tuli.
4. O le tāua ia o le galuega fa'atinā.
5. Tāua tinā auā o le pae ma le auli o ia fo'i o le Ola mo tagata uma.

PESE: Pese ma Viiga (Pese 360)

TATALO: Fa'afetai mo le fa'asoa, fa'afetai mo nai o matou tinā, fa'amagalo i matou uma ma tumau mai i lenei aso ma ona sauniga uma. Amene.

MANUIA LE SAUNIGA O LENEI ASO SA.

ASO SA ME 17, 2026

MATAUPU: MATAUPU FA'AVAE

TUSI FAITAU: MAREKO 4: 35-41

SINI: Ia malamalama fanau o mataupu fa'avae e pogai uma lava iā Iesu, auā o ia o le fa'avae mautū.

FESOASOANI MO LE FAIAOGA: Fa'amalo lava le folau manuia iā tou susuga a faiaoga Aso Sa, malō le fa'apalepale mo le fa'atinoina o la outou matāfaioi fai o lenei taeao. Manatu lava o lo'o tau fai manuia outou uma, 'ae le mafai lava le taulogologo mo ā outou tapenaga o le vaiaso, ia lava pea se taimi e su'esu'e ai le tusi faitau ua tu'uina atu mo la tatou mataupu. Manuia le fa'asoa.

FESOASOANI MO LE FA'ASOA: O lea lava e fa'aauau fa'ataoto a le Ali'i, e pei o le fa'ataoto i le lulū saito. Lea ua fa'amalamalama e le Ali'i pe ā luluina, o nisi e paū i le auala e le lelei auā e aina e manu felelei, o nisi e pauū i luga o le papa e leai se palapala tele e ola ai ma e fa'aumatia e le vevela o le la, o nisi e pauū i luga o le vaotuitui ua ola fa'atasi ai ma 'ua fete'ena'i. A'o isi e pauū i luga o le palapala lelei e tutupu ma fua tele mai, o lo'o fa'amanino mai ai le tāua o le fa'alogo, pei fo'i o lana fetalaiga; "O lē ua iai taliga e fa'alogo ai, inā fa'alogo mai ia o ia." Tāua le auai ma fai o lona lena finagalo i lona 'au so'o, ma ua ia fa'ailoa le tāua o lea galuega o le lulū saito. Ua ia fa'atusa o lē lulū saito o le lulū i le upu, o ai e fa'alogo ai ona alu ane lea o Satani ma aveeseina le upu 'ua luluina i o latou loto. E fa'atusa fo'i i le lulū i le papa moni e ola 'ae leai ni ona a'a e ola ai, o ē na luluina i le vao tuitui e fa'alogo i le upu 'ae maua lava i le loto popole i mea o lenei lalolagi ma le tele o le pepelo i nisi mea ma fai ma ala e le ola ai le upu, e fete'enai fo'i manatu. A'o le luluina i le eleele lelei latou ia e fa'alogo i le upu ma e fua tele ma ii ona tau e fua ai. O lea lava aso i le afiafi na fetalai atu Iesu i lona 'au so'o; "Ina tatou o atu ia i le tasi itu." Ua tu'ua e i latou le motu o tagata ua i le va'a o ia, ua o ma ave iā te ia i luga o le va'a. Fai mai ua fa'aletonu le tau, ua tō timuga ma agi mai le afā, ua afatia le malaga ma ua fati peau ma tumu ai le va'a. O Iesu o lo'o tofā i le taumuli, ua taoto i le aluga 'ae fememea'i le so'o uma. Ua latou fafagu ia Iesu ma fa'apea atu; "Le a'oa'o e, e te lē manatu mai ea iā te'i matou a fano." Ua maitau pea e le 'au so'o le Ali'i, ua tula'i ma vavao atu i le matagi, ua fetalai atu fo'i i le vai; "Fa'alologo ia, 'inā malū ia." Tāua lenā o le fa'alogo e pei o lana fetalaiga, ua fetalai atu pea; "Seā le mea tou te fefefe ai fa'apea? Se ā le mea tou te lē fa'atuatua mai ai?" Ua o'o ia te'i latou le matata'u ma 'ua fetautalatalaa'i ma tu'u fesili po'o ai lenei tagata, ua usiusita'i ai le matagi ma le vai ia te ia? E fa'alogo 'ae lē lagona, e ola fa'atasi 'ae lēiloa, e nuti mea fa'atasi 'a e lē lagona. O le ata fo'i lea fanau pe afai tatou te lē maua le fa'alogo i matua ma le 'au matutua atoa ai ma lo tatou fa'alogo pea i le Atua.

TAULOTO: Mareko 4: 40

GALUEGA FA'ATINO: Tufa ni pepa i fanau e tusi mai ai ni mea sa lē fa'alogo ai i matua, atoa ma ni mea fo'i sa fa'alogo manino ai i le fetalai mai o le Atua. O fea e sili o le fa'alogo po'o le lē fa'alogo? Avanoa fa'asoa.

A'OA'OGA: O nai a'oa'oga e fa'asoa ai ma le fanau, e mana'omia fo'i nisi a'oa'oga mai iā te'i latou.

1. E tāua lava le fa'alogo auā e sili le fa'alogo i le taulaga.
2. A iai taliga e tatau fo'i 'ona manino le fa'alogo atu i le vala'au a le Atua.
3. E lē lelei le mulimuli ia Iesu 'ae ese le mea o fa'amamafa i le mafaufau.
4. 'Aua le fa'ateia gofie i taulu'ilu'i o le ola nei.
5. A tele mea e lolofi mai manatua le Atua e fa'amama avega i faigata o le ola nei.

PESE: Pese ma Viiga (Pese 369)

TATALO: Fa'afetai le Atua i le fa'asoa ua maua ma ia e fa'atasi mai ma fa'amagalo i matou uma i lou alofa tele mai. E ala ia Iesu le tatalo. Amene.

FIAFIA E VIVI'I PEA I LE ATUA.

ASO SA ME 24, 2026

MATAUPU: O OA O LE ALOFA TUNOA O LE ATUA. (PENETEKOSO)

TUSI FAITAU: EFESO 1:3-10

SINI: Ia malamalama tamaiti o Iesu Keriso o le fa'aolataga ma le fa'aatoaga o tagata uma, ma o ia lava o le ulu o le galuega.

FESOASOANI MO LE FAIAOGA; Malo lava le onosa'i fa'afetai le taupati i feau ma galuega o feagai pea ma outou, manatu lava o lo'o manuia mea uma e ala i le fesoasoani mai o le Agaga o le Atua mo i tatou. 'Ae o le fa'amanatu pea mo faiaoga, 'ina 'ia saunia pea ma lava se taimi e mafuta ai ma le tusi faitau i aso o le vaiaso auā lau tapenaga mo le Aso Sa. Manuia le fa'asoa.

FESOASOANI MO LE MATAUPU: Ua tatou iai i lenei taeao fou o le tatou mataupu fa'asoa mai le tusi o Efeso, o le fa'amalosi 'au a le aposetolo mo le ekalesia i Efeso, 'ina 'ia 'aue ne'i galo le Ali'i. O Iesu e ala mai ai fa'amanuia fa'aleagaga, o le mea lea e tatau ai ona tatou fa'afetaia pea o Ia o lē 'ua fa'amanuia mai iā te'i tatou i mea uma lava e manuia ai i le Agaga, i mea oi le lagi. O ia fo'i na filifilia i tatou a'o le'i fa'avaeina le lalolagi, 'ina ia paia i tatou ma ia tumau pea le alofa tele mai o lo tatou Atua iā i tatou uma. O le mea fo'i lea ua ia manatu ai e ta'ua i tatou o tamafai māna 'ae 'auga lava ia Iesu. Auā o Iesu ma lona manaoga 'ia fealofani i tatou, ma ia tatou maua le ola fa'a kerisiano. O le mea lava lea ua naunau ai le aposetolo ma ia fa'atusaina ai le ekalesia o le tino a'o Keriso o le ulu lea, ua ia fa'atusaina fo'i le ekalesia o le fale a'o Keriso o le ma'a tulimanu lea. Ina ia fa'atusaina fo'i i le va fa'a ulugali'i o le ekalesia o le avā a'o Keriso o le tane lea. O mea uma e tumu ai le alofa tunoa o le Atua, o le mea fo'i lea e tāua ai le manatua o Iesu i mea uma, auā o le fa'aolataga na ia saunia o le fa'aolataga mo tagata uma, e lē fuaina. O lona lava finagalo ma lana pule aoao na saunia ai e ia lava sauniuniga i le fa'a'atoaga o tausaga o mea uma lava oi le lagi, 'atoa ma i latou i le lalolagi. Tāua fo'i lea fanau pe a tatou mafaufau i lenei taeao o le Penetekoso, o le auina ifo o le Agaga Paia e fai ma ō tatou fesoasoani sili. E pei fo'i o le finagalo o le Atua mo le ekalesia i Efeso, 'ia 'aue ne'i galo le Ali'i auā o lona alofa ua fai ma oa e fa'atumauina ai lo tatou ola fa'atuatua pea i le Atua. Fanau e, 'aue nei galo le fa'aolataga na saunia e Keriso 'ina 'ia tatou maua ai le ola a'o le ola e fa'avavau.

TAULOTO: Efeso 4: 4

GALUEGA FA'ATINO: Manaia 'ae tufa ni pepa i fanau e tusi mai ai; O ā ni oa ua fa'asoa mai ai le Atua i ō tatou tagata? O le ā le eseese o oa i le lalolagi ma oa mai le Atua?

A'OA'OGA: O nisi o a'oa'oga e fesoasoani i a'oa'oga ua aumaia e fanau e fa'atatau i le tatou tala.

1. O le tumau i le Atua e leai ai se mea e popole vale ai.
2. O le Atua e telegese lona to'asā 'ae tele pea le tunoa o lona alofa i le tagata.
3. Ia manatua o Iesu o le ulu ia o le galuega e pei ona fa'amalamalama e Paulo.
4. A vaivai ma mafatia manatua pea le fa'aolataga na saunia e Keriso e tatou te maua ai le ola atoatoa.
5. E lē mafai 'ona e auauna i le oa ma le Atua.

PESE: Pese ma Viiga (Pese 371)

TATALO: Ua i'u la matou fa'asoa le Atua ma ia e fa'atasi mai i lenei Aso Sa ma fa'amagalo i matou uma e ala ia Iesu la matou tatalo. Amene.

E LELEI A LE ALI'I E TATAU ONĀ MATUĀ VIIA O IA.

ASO SA ME 31,2026

MATAUPU FA'AMANATU

FESOASOANI MO LE FAIAOGA: Ua tatou o’o mai i le Aso Sa mulimuli o lenei masina, ma o le Aso Sa o le fa’amanatu mo le vasega. E taoto atu lava iā outou susuga i faiaoga le fa’atinoia o ā tatou suega, e pule fo’i le faiaoga i le faiga e fai ai, o nai fesili na e fa’aopoopo ane i lau tapenaga mo le suega. Manaia fo’i pe ā mae’a ona fa’amalamalama lea o fesili o le su’ega, manuia tele le fa’amanatu i fanau.

FESILI MA TALI!

1. Fesili: O fea na tuli iai e le Atua Iona?

Tali: Na fetalai le Atua e alu i Nineva ‘ae sola i Kasesa.

2. Fesili: O le ā le mea ua manana’o ai le ‘au tusiupu ma le ‘au faresaio i le Ali’i?

Tali: O se fa’ailoga e fa’atatau iā te ia.

3. Fesili: O le a se mea ua tupu i Nineva?

Tali: Ua tupu tele le amio leaga i luma o le Atua.

4. Fesili: Aisea ua masalosalo ai Toma?

Tali: Manatu lava Toma ua maliu Iesu e le toe tu mai.

5. Fesili: O ai na fa’ailoa iai le Ali’i ma lona toetū?

Tali: O fafine na ala usu e ave mea magoni i le tu’ugamau.

6. O le ā le mea na tupu iā Toma ‘ina ‘ua vaai tino i lima ma vae o Iesu na tutu’i i fao?

Tali: ‘Ua talitonu ma ia fa’apea atu; Lo’u Ali’i e, ma lo’u Atua e.

7. Fesili: O le ā sau meaalofa mo lou tinā i lenei Aso o Tinā?

Tali: Ia tumau iai lo’u alofa ma ‘ou usita’i i taimi uma.

8. Fesili: O le ā le fa’ataoto lea e Talanoa ai le Ali’i i le tala?

Tali: O le lulū saito.

9. O fea lea e lulū ai saito a le tagata lea?

Tali: O le auala, o le papa, o le vaotuitui ma le eleele lelei.

10. O fea o nei vaega e ola lelei ai le saito?

Tali: O le eleele lelei.

11. Fesili: O le ā le mea lea e fa’amamafa i lenei fa’ataoto?

Tali: O le Upu Moni ‘ia lelei lona folafolaina.

12. Fesili: Aisea e lē ola lelei ai le saito e paū i luga o le papa?

Tali: E velasia i le la ma e leai se palapala e maua ai.

13. Fesili: Ua fa’atusa Iesu i le ulu a’o le ekalesia o le tino, sa’o pe sese?

Tali: E sa’o.

14. O fea lea e tusi iai le aposetolo?

Tali: O le ekalesia i Efeso.

15. Fesili: O le ā fo'i le uiga o le Penetekoso?

Tali: O le afio ifo o le Agaga Paia e fai ma ō tatou fesoasoani sili.

MANUIA TELE LE OLA VIVI'I I LE ATUA.

ASO SA IUNI 07, 2026

MATAUPU: LE ALOFA TUNOA O LE LIMA MAFOLA.

TUSI FAITAU: 2 KORINITO 9:1-7

SINI: Ia iloa e fanau le tāua o le foa'i atu ma le matamau, auā o mea uma 'ua tatou maua o meaalofa foa'i fua mai e le Atua iā te'i tatou e fiafia ai i le ola.

FESOASOANI MO LE FAIAOGA: Fa'atalofa atu fo'i i lo outou mamalu i lenei taeao fou ua tatou maua i le alofa o le Atua. Fa'amalō atu lava le galulue, manatu lava o lo'o manuia feau ma galuega o lo'o feagai ma outou. 'Ae o le fa'amanatu masani lava, 'ina 'ia tautuana lau tapenaga o le vaiaso, ia lava pea lou taimi e mafuta ai ma le tusi faitau o le mataupu o lenei Aso Sa. Ia manuia lau tapenaga.

FESOASOANI MO LE MATAUPU: O le lua o tusi a le aposetolo na ia tusi atu ai i le ekalesia i Korinito, sa tusia lava e tali atu ai i nisi o fa'afitauli sa feagai ma le aposetolo ma le ekalesia. Aemaise sa iai nisi sa tete'e atu iā Paulo ma lana galuega tala'i 'ae sa iai pea le loto o le aposetolo e fo'ia nei fa'afitauli. O le vaega la o le tusi lea na faitauina o lo'o taoto i le vaega muamua i le fiafia o Paulo i le fa'atuatua pea o le ekalesia i Korinito. E ui i le tele o fa'afitauli sa feagai ma Paulo ma Timoteo i le vaega lua o le Korinito e lua, o le to'atele o ē sa vevesi i totonu o le ekalesia 'ona sa iai le 'au talapepelo sa latou tala'i atu le tala sese i Korinito. O le tāua o le matamau ma o le ala fo'i lea e tatau lava ona faia mea alofa i le agaga lea. O le mea lava lea na tusi atu ai le aposetolo ia maua le agaga e foa'i atu ai ma le matamau, na iloa e Paulo le iai o le loto fesoasoani ma ua ia manatua ai lona mitamita i Maketonia. Na ia mitamita fo'i iā te'i latou i lenei mea, na ia auina atu le 'au uso lenā, ina ne'i fa'aleaogāina lo latou mitamita. Na ia fa'amalosi pea 'ina ne'i fa'amāina i matou 'ae tu'u ai pea outou i lenei fa'amalosi i le mitamita pe afai matou te ō atu ma ni Maketonia, 'ona iloa ai lea o outou 'ua lē uma ona saunia. O lona lenā manatu e fa'amuamua le 'au uso lenā, ia mua'i sauniuni ai la outou meaalofa na ta'ua mai anamua, ia saunia e pei se mea alofa lava 'ae le o se mea na tupu i le matape'ape'a. Ua iloa e le aposetolo e to'atele ē laititi le saito e lulū, e itiiti fo'i ana e selesele, a'o lē 'ua tele ana e lulū e tele fo'i ana e selesele mai. O le mea lea e tāua ai le foa'i ma le loto, 'aia ma le tigā 'aia fo'i ma le fa'atauanaui, auā e alofa le Atua i le foa'i ma le loto malie. Auā e mafaia e le Atua 'ona fa'a faula'i meaalofa uma iā te i latou ma e fa'alava fo'i e le Atua mea uma lava. Ua ia manatu e fa'alavaina i aso uma iā te outou o meaalofa ma fa'a faula'i mo i latou galuega lelei uma. O le manatu lenā o Paulo, na ia fa'amalosi atu ai i le ekalesia mo le ola ia matamau ma foa'i ma le malie o le loto. O le mea fo'i lea fanau e tatau 'ona tatou faia, ia malie le loto ma fiafia e foa'i mo le Atua, auā o Ia lava na faia le foa'i sili mai lona loto malie ua tatou maua ai le ola e fa'avavau.

TAULOTO: 2Korinito 9: 7

GALUEGA FA'ATINO: Ia fa'amatala atili mai e fanau le uiga o le foa'i e faia ma le matamau. Tu'u iai se fitu minute e tusi mai ai tali mo le fesili.

A'OA'OGA: E tāua pea le fesili i fanau mo se a'oa'oga ua maua mai i le tala, a'o nai a'oa'oga na e fesoasoani mo lau susuga auā le mataupu.

1. 'Aua le mataoge a 'ia matamau le foa'i.
2. 'Aua nei galo o mea ua tatou maua o mea uma mai le Atua alofa'
3. Foa'i ma le loto malie, auā a malie le loto e maliē tele lena i le silafaga a le Atua.
4. Ia alofa atu i lē lua te tuaoi ia pei o oe lava iā te oe.

5. Ia tutusa tagata uma i lau va'ai 'aia le fa'apito manū ia tasi.

PESE: Pese ma Viiga (Pese 230)

TATALO: Fa'afetai le Atua i lou mafuta mai ma fesoasoani mai i lā matou fa'asoa, fa'amanuia ma fa'amagalo i matou uma. E ala iā Iesu le tatalo. Ameme.

IA FIAFIA PEA I LE ALI'I.

ASO SA IUNI 14, 2026

MATAUPU: O LE LALĀ O LE ALI'I.

TUSI FAITAU: ISAIA 4: 2-6

SINI: Ia manino fanau o la la'au mo le Ali'i, ua fai lea ma matagofie ma le vii'ga, o fua o le laueleele ua fai ma mea lelei ma le matagofie i tagata uma lava, ma ua maua ai le manuia o le malō o le Mesia.

FESOASOANI MO LE FAIAOGA: E fa'atalofa atu fo'i i lau susuga a le faiaoga i lenei taeao fou ua tatou maua i lona alofa, manatu o lo'o manuia mea uma e ala i le pule fa'a soifua a lo tatou tamā oi le lagi. Ae ao lava ona le uma le fa'amanatu atu pea i lau susuga lau tapenaga, ia lava pea se taimi o lenei vaiaso e sailiili ai ma su'esu'e pea i le mataupu. Manuia tele le fa'asoa atu i fanau a le ekalesia.

FESOASOANI MO LE MATAUPU: O valoaga a le perofeta o Isaia, mo le fanau mai o le Mesia, o le vaitau sa matuā amioleaga le nu'u uma. O le vaitaimi tonu lea 'ua maliu ai le tupu o Iuta o Usia. A'o malosi pulega a le malō o Asuria, ma latou puleaina le malo o Isaraelu. O le to'atele fo'i o tagata Iuta na ave fa'a pagotāina i Asuria. O le a'afiaga lenā na o'o i lea faigamalō, o tapua'iga ma a'afia ai olaga o ia malō e lua. O le fai o Isaia ma perofeta na le'i faigofie lona tula'i mai na ia taumafai ai i tagata sa totoe i Ierusalema ma i latou sa le'i mafai 'ona ave i le tafeaga. O lagona ma manatu o le perofeta ua ia manino o ia o le la la'au a le Ali'i, o lona finau malosi mo le malō fa'atafea na fai ma ala e fai ma mea matagofie ma le vi'ia, o le fua fo'i o le laueleele e fai ma mea matagofie mo Isaraelu o ē ua sao. E faia lava e le Ali'i mo e 'ua tu'ua Siona ma ē 'ua toe i Ierusalema atoa ma i latou uma o ē ua tusia fa'atasi ma e o ola i Ierusalema. Fai mai e fufulu ese e le Ali'i le otaota o tama fafine o Siona, e mulumuluina fo'i i le toto o Ierusalema ai totonu iā te ia i le agaga o le fa'amasinoga ma le fa'amuina. E faia lava e le Ali'i i luga o le mauga o Siona, mauga e osi ai taulaga mo le Ali'i e iai le ao ma le asu i le ao, ma le pupula mai o le asu i le pō ma e iai le mamalu i luga o le matagofie uma. Tāua fo'i le iai o le fale apitaga e fai ma paolo i le ao 'ona o le vevela, e fai fo'i ma mea e malu ai, ma mea e ulu ai i timuga ma le uaga. O valoaga e tumau i le manuia o le malo o le Mesia e pei 'ona tu'ualaga ai le perofeta o Isaia. O valoaga mo se manuia mo le nu'u le fa'alogo ma lē usita'i i le Atua. Tāua fo'i lea mo tatou fanau, ia tatou manatua o Iesu o le uō silisili mo i tatou uma ma e tataua ona tatou fa'alogo ma usitai 'ina ia tumau mai pea lona matagofie.

TAULOTO: Isaia 4: 5b, 6

GALUEGA FA'ATINO: Tatou toe silasila ane i le fuaiupu e ono, le ā le uiga o le fale apitaga? Manaia 'ae toe fa'asoa po'o le ā sona tāua i le soifua o le tagata.

A'OA'OGA: O nai a'oa'oga e fa'atupu manatu mo le tala sa fa'asoa ai fanau, e fesoasoani i fanau ma ni a'oa'oga ua maua.

1. E lē lelei le amio leaga, e i'u ai i le malaia.
2. Tāua le fa'alogo ma faia le mea e mana'o iai le Atua mo i tatou.
3. Mana'o le Ali'i e savavali i tatou i ona ala uma.
4. O le perofeta o le so'oupu e faia le mea e finagalo mai ai le Atua i ona tagata.
5. O le Mesia o lo tatou lea lavea'i silisili.

PESE: Pese ma Viiga (Pese 231)

TATALO: Fa'afetai le Atua mo le fa'asoa mai ma ia iai pea lou alofa i luga iā i matou uma. Fa'amagalo i matou uma ma fesoasoani mai i lenei Aso Sa paia. E ala ia Iesu le tatalo. Amene.

MANUIA LE TAPUAIGA FAITELE I LE ATUA.

ASO SA IUNI 21, 2026

MATAUPU: FA'ATATAU I TAMASEKO.

TUSI FAITAU: ISAIA 17: 1-9

SINI: Ia manino fanau o Tamaseko le laumua o Suria, lea o le ā fa'atamai'a talu le nu'u le fa'alogi i le Atua ma 'ua faia ai le fa'amasinoga tonu a le Atua.

FESOASOANI MO LE FAIAOGA: Ua malo afua ailao ua maua lenei taeao fou i le alofa o le Atua. Fa'amalo atu le pale i feau ma galuega o lo'o feagai ai ma outou. Ua tatou tu lalata i le fa'ai'uina o mataupu o lenei afa muamua o le tausaga. Ae o le tauologologo lava e maua ai manatu e fesoasoani ai mo lau tapenaga o lenei Aso Sa, ia manatua pea la lua mafutaga ma le tusi faitau o le mataupu 'ina ia lava se taimi e su'esu'e ai. Manuia le fa'asoa.

FESOASOANI MO LE MATAUPU: Ua tatou iai i lenei taeao fou, i le pule fa'asoa mai a lo tatou Atua alofa. O le tatou mataupu o lenei taeao o lo'o aumaia ai e Isaia le tala i le malaia o Tamaseko, o lea malaia e mafua mai i le nu'u i lo latou le usita'i i le Atua. O le vaitau o le malosi o Asuria ma lo latou tula'i mai, ua fai ma avega mamafa ia Tamaseko, ua le fai ma aai ma 'ua avega e fai ma faupuega fale 'ua pauū. E tu'ulafoa'iina aai uma, ma e fai ma lafumanu latou te taoto ai, ma o le faia ai o le fa'amasinoga tonu a le Atua. E fa'aumatia 'olo o Efaraima ma Tamaseko, atoa ma ē o totoe i Suria, e pei o le fanauga a Isaraelu o lo'o fetalai mai ai le Ali'i o 'au. O le molimau a le tusitala o le tusi o Isaia le fa'aitiitia ai le mamalu o Iakopo, e tino vale fo'i o ia sa puta, e fa'atusa fo'i i selegā 'au saito ua fa'atamai'a ma lē toe fua mai mo le seleseleina. O le mea fo'i lea e fa'asaga ai le tagata i Lē na faia o ia, e va'ava'ai atu fo'i ona mata i le paia o Isaraelu. E le toe fa'asaga atu o ia i fatafaitaulaga ma mea uma na faia e ona lava lima. O le mea fo'i na faia e ona tamatama'ilima o tupua ma mea uma na faia e o'o i ona a'ai ua pei e foliga 'ua nofo 'olo ma ua pei o se togāvaio ma le tumutumu o la'au, sa latou tu'ua i luma o le fanauga a Isaraelu, e avega fo'i ma mea e fa'atafunaina. O le ata o le a o'o iai Tamaseko o le fa'atamai'a ma o le a o'o iai le fa'amasinoga tonu a le Atua talu le amio leaga o lona nu'u. O le mea fo'i lea fanau pe afai tatou te lē usita'i i o tatou matua, ia maua pea le agaga e tumau ai i le ava ma le migao e fiafia ai e fa'alogi ma faia mea uma e fa'atunuina ai i tatou. O le usita'i fanau e tupu ai le alofa mai o ō tatou matua ia i tatou e pei 'ona alofa o le Atua i lona nu'u. O le mea lava lea e tāua ai le fiafia e matau le Tulafono fo'i lea e lima; Ia e ava i lou tamā ma lou tinā, e fa'alevaleva ai aso e foai'ina mai e le Atua iā te oe.

TAULOTO: Isaia 17: 1, 2

GALUEGA FA'ATINO: O le ā se mea e tatau 'ona fai pē afai e fa'agalo mai e le Atua o tatou tagata 'ona o le lē fa'alogi ma usita'i? Tāua le fa'asoa ma tusi i lalo ni nai manatu e maua e fanau e tapena ai i latou mo se manuia e maua mai i le fa'asoa.

A'OA'OGA: Tele lava a'oa'oga e tatau ona maua mai le tala, a'o nai a'oa'oga na e fesoasoani i fanau ma latou a'oa'oga 'ua maua.

1. E sili le usita'i i lo le ga'o o le mamoe po'a.
2. 'Aua le mana'o tele a 'ia fa'alogi i le Atua fetalai.
3. Manatua le Atua le pule aoao 'ae le o le manatua o atua ese.
4. O le ola fa'amauuluga e fa'amauulaloina, a'o le ola fa'amauulaloina e fa'amauulugaina.
5. O lo'o i le Atua le pule uma 'ae soia ia le faia o le pule a le tagata.

PESE: Pese ma Viiga (Pese 2)

TATALO: Fa'afetai le Atua mo lenei aso ma le mataupu fa'asoa, fa'amagalo i matou ma fesoasoani i sauniga o lenei Aso Sa. E ala ia Iesu le tatalo, Amene.

E LELEI A LE ALI'I.

ASO SA IUNI 28, 2026

MATAUPU FA'AMANATU

FESOASOANI MO LE FAIAOGA: Malo le onosa'i i a tou susuga i faiaoga, malo le galulue i lenei afa muamua o le tatou aoga Aso Sa. Ua tatou iai i le toe fa'amanatu o lenei taeao, a'o le toe fa'amanatu fo'i lea mo la tatou vasega i lenei afa muamua o le tausaga aoga. E ia te oe lava le faitalia i le faiga o lau fa'amanatu, ia lava pea se taimi e toe sailiili ai ma o le tatou suega mulimuli foi lea. Manuia le alo atu i le fa'amanatu o lenei taeao.

FESILI MA TALI!

1. Fesili; O le ā se mea o lo'o fa'amamafa e la tatou tala o lenei taeao?

Tali: O le Matamau.

2. O le ā le manatu o le aposetolo i ē lulū saito?

Tali: O ē laititi ana saito e lulū e laititi fo'i mea na te selesele.

3. O le ā le uiga o le upu Matamau?

Tali: O le fiafia e foa'i atu ma le loto malie.

4. O le ā le upu fa'a feagai o le Matamau?

Tali: O le Mataū po'o le Mataoge.

5. O le a le mea na iloa ai le matamau o Iesu ia i tatou?

Tali: O le Fa'aolataga na ia saunia mo lo tatou fa'amagaloga.

6. Fesili: O le ā le tau i o le tagata e fiafia e fai le amioleaga?

Tali: O le fa'asala.

7. Fesili: o ai o lo'o fa'atusa iai lala o le Ali'i?

Tali: O lo'o fa'atusa i tagata.

8. Fesili: O le ā le mea ua tupu i le nu'u i le vaitau o Isaia?

Tali: Ua tele le lē fa'alogo i le Atua.

9. Fesili: O ai le a'ai lea o le a fa'atamai'a e pei ona aumaia e le tala?

Tali: O Tamaseko.

10. Fesili: O ai le malō o lo'o malos i le vaitau o Isaia?

Tali: O Asuria.

11. Fesili: O le ā le mea fo'i lea e lē tataua ona faia e le tagata i isi tagata?

Tali: O le fa'amasinoga auā o le mea patino lava lea a le Atua.

12. Fesili: Se mea lelei le lē usita'i?

Tali: Leai, auā e fetaia'i ai ma puapuaga ma faigata.

13. Fesili: Fa'auma mai le fuaiupu lea; "O lea fo'i e ai le mamalu o, e vale fo'i ia sa (aso, fa'aitiitia, Iakopo, tino, puta)

14. Fesili: O le laumua o Suria o Tamaseko. (sa'o / sesē)

15. Fesili: O le ā se mea o lo'o tautala iai Isaia e pei ona aumaia i le fuaiupu e iva?

Tali: O le fa'atamai'a o ana a'ai ma vao nofo olo, ma fa'atusa i se mea 'ua tu'ua i le vaomatua e pei 'ona tu'ua ai o Isaraelu ma lo latou lē talitonu i lo latou Atua.

MANUIA TELE LE VIIGA I LE ATUA SOIFUA.

.....

MANUIA TELE LE ALO ATU I MALOLOGA O LENEI VAITAU O LE MAFANAFANA, IA MAUA E OUTOU UMA FANAU SE TU'UAGA FIAFIA MA LE MANUIA. IA AGALELEI FO'I LE ATUA IA TOU SUSUGA A FAIAOGA, IA FIAFIA PEA I LE ALI'I, MA MAUA LE ALOFA I FANAU UA A'OA'OINA. MANUIA LE TU'UAGA, TOE FEILOA'I I LE AFA MULIMULI O LENEI TAUSAGA, FA'AFETAI TELE LAVA.



Tautua Printing Press
1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkas.or>